

Front Cover

Back Cover

Nga Mahi A Te Hui O Te Hahi Maori O Te Atirikonatanga O Te Waimate I Te Pihopatanga O Akarana I HUIHUI KI WAIMAMAKU IA HANUERE 31 ME PEPUERE 1, 1896. Me Nga Mahi A Te Hui O Te Hahi Maori O Te Atirikonatanga O Waikato. I HUIHUI KI [UNCLEAR: OTOROHANGAA] APERIRA 14, 15, 1896. Akarana I [UNCLEAR: PEREHTIA] E HENARE PERETE, HOTERANI TIRITI. 1896.

Nga Mema O Te Minenga Tuawha O Te Hui Tuawhitu O Te Hahi Maori O Te Atirikonatanga O Te Waimate. I Te Pihopatanga O Akarana.

Ko Te Paraimete O Niu Tireni Te Upoko.

Kihai ena i tae ki te Hui.

NGA MINITA. VEN. E. B. KARAKA, Atirikona o te Waimate.

NGA MANGAI REIMANA.

I MINE te Hui o te Hahi Maori o te Atirikonatanga o te Waimate ki te wharekarakia i Waimamaku i te Paraire,. Hanuere 31 me te Harerei, Pepuere 1, 1896. I te hawhe paahi o te tekau karaka a.m. te karakia whakapuare i te Hui. Te hunga i te karakia e 70: i tango i te Hapa Tapu, 22, ko nga mema anake. Te ohaoha £1 7s.1d. i tukua mo te perehitanga i nga mahi o te Hui. I te toru o nga haora p.m. ka noho te Hui a ka oti te karangaranga e te tumuaki nga ingoa o nga mema, ka kii e ia he Hui e rite ana ki ta te ture i whakatakoto ai. Ano ka mutu te inoi ka whaikorero te Atirikona. I timataia tana korero ki te pukapuka a te Paraimete e mau nei:—

AKARANA, *Te ra o Paora, 1896.*

E aku hoa, e nga mema o te Hui o te Hahi.

E pouri ana au moku te tae ki te Hui o tenei tau; otira ekore te Hui e hapa i au ka ngaro, inahoki ko to tatou hoa ko Atirikona Karaka hei whakakapi moku. Na te mate, me te maha o nga mahi kua tapiritia mai i au ka meinga hei Paraimete mo tenei Porowini, te tae ai au ki Waimamaku.

Mehemea i tae au ki ta koutou Hui, erua tahi nga mea e whakaaria e au ki o koutou aroaro (1) ka whakahau i nga minita kia ngahau, kia hono tonu te haerere ki te tiro tiro i nga tangata o a ratou Pariha. (2) Ka whakahau i nga minita, i nga tangata katoa hoki, kia puta te uaua ki te ako i nga tamariki ki nga tikanga o te Whakapona Karaitiana.

Tera pea e whai korero te Hui mo nga mahi a to tatou hoa a Hohepa Matiu i roto i nga iwi i raro na. Mehemea ka takoto he tikanga kia kohikohi te iwi mo tetahi paraihe whakamaharatanga ki a ia ki te Wharekarakia i Kaitaia, ka uru au ki taua kohikohi, ka hoatu kia kotahi pauna. E inoi ana au kia noho te Atua kia koutou ia koutou e mahi na; me taku tono ano kia inoi koutou moku.

Na to koutou tuakana, Pihopa aroha.

(Signed) W. G. AUCKLAND.

Ko te whai-korero tena a te Tumuaiki:—E hoa ma, e nga minita me nga mangai reimana o tenei Atirikonatanga; tena koutou; ko au e tu atu nei he riwhi mo te Pihopa. Na te mate me te raruraru ia i arai te tae mai ai ki tenei Hui.

Me matua whakawhetai ki te Atua mo tatou ka mine ora mai ki konei inaianei. Ahakoa kei te ngaro nga mema tokorima, ehara i te mea na te mate i ngaro ai. Ahakoa i tino tata etahi o tatou k te waha o te poka i te tau kua pahure nei, whakahokia mai ana e te Matua o nga atawhainga katoa, whakaroaina ana nga ra hei mahinga ma tatou ki te ao nei. Otire tera ano etahi o nga tangata whaiingoa o te Hahi kua riro atu. Kua tomo ki te okiokinga a Rev. Hohepa Matiu, te kaikawe i te Rongopai ki te Rarawa, ki te Aopouri. E ono tekau ma wha nga tau i mahi ai taua kaumatua i roto i te Hahi o Niu Tireni, a kitea nuitia ana e ia nga hua o tana mahi. Kei te

mohio katoa tatou ki tana uaua ki te mahi, i te timatanga mai ra ano a tae noa ki te ngoikoretanga o tana koroheketanga. He tamariki nana te tokomahatanga o a tatou minita Maori. Tenei ia kua tutataki ki a Matiu Taupaki, ratou ko Renata Tangata, ko Hare Peka, ko Rupene Paerata, ko Hare Reweti, ana tamariki, ki te Rangī: a ko etahi e ora mai nei ano. Ko a tatou hoa Maori kua tangohia atu, ko Waaka Rangaunu o Ahipara, ko Wiremu Rakena Kaitaia o Peria, ko Riwi Taikawa o Whangarei, ko Wiremu Katene o te Waimate. Ko ena tangata katoa he kaihapai, he kaiwhakaako i nga tikanga o te Whakapono. Heoi te mihi ki o tatou hoa kua ngaro atu nei i o tatou kanohi, erangi me whakapai tatou mo aua pononga a te Atua kua mate atu i tenei ao i runga i te whakapono, i runga i te wehi ki a Ia: me te inoi kia homai he kaha e aru ai tatou i a ratou mahi pai, kia uru tahi ai tatou ki Tona rangatira-tanga i te Rangī.

Tenei etahi men e manawareka ai nga tangata o te Pihopatanga o Akarana; ko te whakaritenga e te Hinota Niu i to tatou Pihopa nei Paraimete mo te Porowini o te Hahi o Nin Tireni. Kua waiho in hei tumuaki mo nga Pihopa o enei motu, hui atu ki to Meranihia. Tua rua take hari o te Hahi Maori ko te motuhanga o Atirikona Renata Wiremu hei Pihopa mo Waiapu. No tatou ake tena Pihopa, inahoki i whanau ia ki Pailia. Kua whai Pihopa a Poneke i a Dr. Warihi, no Ingarangi, a ka nui tana Whaingoi ki te mahi i roto i te Hahi Maori o tona takiwa. Kotahi atu mea hei koanga ngakau, ko te rerergaketanga o o tatou hoa i Waikato: me te mea kua tuhuri katoa mai ki te Karakia. Kua tuwhera nga tatau puta noa, puta noa ki nga kaikauwhau i te Kupu. Kuamanaakitia nuitia e te Atua te mahi a o tatou teina a Revs. Taimona Hapimana raua Nikora Tautan. Ko nga tapu, me nga makutu, me nga tohunga Maori kua whakakorea e Mahuta. Kua puta tana paanui kia whakamutua te mahi Ratapu, a kia waiho taua ra mo te karakia anake. Rongo tonu nga iwi katoa e piri ana ki te kingi ki taua ture. He hoa tupu, he kaitautoko, he tuara a Mahuta na nga minita e haere ana ki Waikato:—Tetahi, kua ara te wharekarakia ki te Pourewa i tawahi kau atu i Whatiwhatihoe, na ratou ano i hanga. E tae tae tonu ana nga tangata o tena takiwa ki te karakia. Na te rua rua o nga minita i roa ai a Waikato ki te hoki mai ki te whaka-pono i whakarerea nei e o ratou matua.

E toru tahi nga pariha minitakore o tenei Atirikonatanga; ko te Waimate, ko Paihia, ko te Wairoa, Kaipara, a tera pea e kapi a te mutunga o te tau nei. Tokotoru nga tangata o enei takiwa kei te Kareti i Turanga. Ki te tikanga me mohio nga tangata e meinga hei minita a muri nei ki te korero pukapuka Ingarihi. E neke ana te matauranga o te iwi Maori ki te reo Pakeha, a ekore e rawe kia kuware ko nga minita, kia mohio ko nga tangata noa iho. Tetahi hoki, e kapi haere ana te motu i te Pakeha, a, a tenei ake whakatupuranga, tera pea e waiho he Maori hei karakia i a ratou. Na kona i tika ai hei tupara te minita Maori. Tenei tetahi mea e pouri nei te ngakau; ko te kore hiahia o nga tamariki o Ngapuhi ki tenei mahi. He aha ranei te take i pena ai? He mahi ranei na te tutua? Ki te whakaaro iho, kahore rawa he mahi i rangatira ake i ta te minita. Heoi, e whakaparahakotia ana e o tatou tamariki ano he mahi hangahanga noa iho. Ma te Wairua Tapu e whakangakau o tatou tamariki kakama ki tenei mahi. Ki te tikanga me kaua e kore te tokorua, tokotoru ranei o nga tangata o tenei Pihopatanga ki te Kareti hei whakakapi i nga turanga o nga minita koroheke, mate ranei.

Tenei ano tetahi mea whakapouri, inahoki he tohu kahakore no nga tangata o te Hahi, me te mea te Whakapono he paru maa e pania ana ki te kiri o te tangata. I maa, i maa i te tuatahi a kihai i roa, makuu kau i te tupuhi, kua ngahoro; a kitea iho e rapa tonu ana ko te kokowai a nga tupuna. Na te aha ra te maha o nga karakia pohehe i roto i nga Maori? Tu kau ake te tangata ma tana ako hou, hohoro tonu te aru atu te tokomaha. Tenei pea te take i rongo ai te iwi ki ena poropiti teka-ko te whakananunga i te rarangi Karaipiture hei whakapatipati i te kuware. Hore rawa te iwi e whakawaia ana e tahuri ki muri, e maharahara ki te teka o nga poropititanga horihori o nga tau kua pahure tata nei. Ko te tamaiti kua wera ka tupato tana whakatata ki te ahi: tena ko te hanga kuware nei, hore rawa e tupato, ka whai ano ki nga mea hou. E hoa ma, he aha te Maori i pena ai? Kihai i ngoto te Kupu ki te ngakau, na kona e pena ai. Kua kite ranei ratou i te he o te akoranga a nga Karaipiture? Kua kurupopo ranei te waka nei ahakoa kua tata ki te rua mano nga tau i maanu ai; na kona pea te tangata i tahuri ai ki te hanga mokihi raupo, to korari ranei. Heoi ra, kia ata matau te hunga e taurihuri ana ki te Momona, ki etahi atu karakia ranei; kahore atu he huarahi e tae ai te tangata ki te ora i ta nga Karipiture tapu i whakatakoto ai.

Ma te Atua e tuku mai tana Wairua, kia whai kororia Ia i a tatou mahi katoa; he mea timata, he mea mahi, he mea whakaoti i roto i a Ia; kia whiwhi ai tatou ki te ora tonu, i te mea e atawhaitia nei e Ia, Ko Ihu Karaiti hoki to tatou Ariki. Amine.

Whakaaria e Rev. M. Kapa, tautokona Riapo Poihipi—E whakapai ana te Hui ki te whaikorero a te Upoko, a e tono ana kia perehitia ki te pukapuka o nga Mahi a te Hui.

Whakaetia ana.

Whakaaria e Rev. W. te Paa, tautokona e Rev. M. te Haara—Ko Rev. M Kapa hei kaituhituhi minita.
Whakaaetia ana.

Whakaaria e Rev. H. T. Papahia, tautokona e Rev. H. N. Paerata—Ko Hirini Katene hei kaituhituhi reimana.
Whakaaetia ana.

Homai ana e nga Mangai reimana nga pire moni o a ratou Pariha. Muri iho ka kokiritia nga whakaari, me nga pitihana me nga patai.

I te aonga ake ka noho ano te Hui, a ka homai te pitihana a Ruka Huru me nga tangata o Waiparera, he tono i nga hua o te ratou tahua whangai minita o te takiwa o te matenga o Rev. Piripi Patiki tae noa ki te wa i tu ai a Rev. H. T. Papahia hei minita mo Waiparera. Whakahokia ana e te Upoko:—Ekore au e matau, erangi ma ratou e patai ki te Komiti tiaki moni i Akarana.

Ruka Huru—he Patai—Kei te ingoa ranei o Whirinaki te £50 i kohia mo te whangai minita o Waimamaku, kei te ingoa ranei o Waimamaku? Whakahoki:—Ekore au e matau erangi maku e patai.

Whakaaria e Wiremu Nepia, tautokona e Anaru Ngawaka—Ko nga kupu tuturu i whakaaetia e nga Hui o mua ake nei kia whakamana rawatia.

Whakaaetia ana.

Whakaaria e Riapo Poihipi, tautokona, e Hirini Katene—He tono kia te Pihopa kia puta he Raihana ki nga Kaikarakia kaumatua: a ma nga minita o nga pariha e whakaatu nga tangata e tika ana kia riro ia ratou taua Raihana.

Whakaaetia ana.

Whakaaria e Riapo Poihipi, tautokona e Henare Taha—Kia rapua he tikanga hei whiu i nga tangata takahi Ratapu ahakoa Pakeha, Maori ranei.

Unuhia ana.

Whakaaria e Eru Pou, tautokona e Hirini Katene—He tono ki nga Pariha katoa o Ngapuhi kia kahi moni hei whakaora i te whare minita o Kaikohe, me te tapiri mai ano nga kaumatua.

Whakaaetia ana.

Whakaaria e Nutana Taurere, tautokona e Pene Tikinui—Kia tino mutu nga ingoa o nga Kaikarakia mate, kua whakarere ranei i o ratou tunga i te pukapuka o nga Hui. Ma nga minita e tuku ki te kaituhituhi i a tau, i a tau, nga ingoa tika o a ratou pariha.

Whakaaetia ana.

Whakaaria e N. Taurere, tautokona e W. Nepia—He tono ki nga Kaumatua, kia tukua mai he Rawiri mo nga Pariha ki nga whare minita takoto ai.

Whakaaetia ana.

Whakaaria e Rev. H. N. Paerata, tautokona e Putete Heke—He tono ki nga tangata o nga kaainga o te; Pariha o Whangaroa puta noa, puta noa, kia whakaritea nga moni i pau mo te whakaotinga i te whare minita o Whangaroa.
Whakaetia ana.

Whakaaria e Rev. M. Kapa, tautokona e Riapo Poihipi—E manawareka ana tenei Hui mo te meatanga i to tatou Pihopa hei Paraimete mo tenei Porowini, me te inoi ki te Atua kia tukua mai te kaha mona e ahei ai ia te waha i tena pikaunga hou.
Whakaetia ana.

Rev. M. Kapa, he patai—He pehea te whakaaro o nga kaumatua mo te Hui i Otorohanga kia whakaurua atu etahi o nga minita o raro nei ki taua Hui? Whakahoki: Ekore au e mohio, [unclear: ne] te mea he Atirikonatanga ke tera. Ko Aperira 14 tu ai taua Hui.
Whakaaria e Rev. Reihana Ngatote, tautokona e Henare Taha—Kaua e hohorotia te arai i te hunga kuware ki te reo Ingarihi mo te Kareti i Khipane.
Whakaetia ana.

Rev. R. Ngatote, he patai—Me pehea nga tamariki poriro; me iriiri ranei, kahore ranei? Whakahoki, me iriiri, ma nga kaiatawhai e mau mai kia iriiria.
Whakaaria e Rev. H. K. Taitimu, tautokona e Rev. R. Kamiti—Kia whakapumautia te moni kohi ma te tangata i roto i nga Hapa katoa o te tau, hei te toru kapa i nga Hapa e ono.
Unuhia ana.

Whakaaria e Rev. H. T. Papahia, tautokona e R. Poihipi—E tangi ana tenei Hui mo te matenga o Rev. Hohepa Matiu o Kaitaia, kua mate nei; he tamariki katoa hoki nana nga minita nei.
Whakaetia ana.

Rev. W. P. te Waha, he patai—Me haere ranei nga [unclear: minite] Maori ki te iriiri i nga tamariki Pakeha ina tonoa e nga matua?

Whakahoki—Ae; engari, me kawe mai ki te Wharekarakia. Ki te matara te kaainga a e turoro ana te tamaiti me haere atu.

Henare Taha, he Patai—Kei te pehea taku tono i Akarana mo e oranga mo Rev. M. te Haara? Whakahoki. Kahore au e mohio.

Hirini Katene, he Pitihana no nga taugata o te Waimate kia te Pihopa mo Timoti Kiriwi he minita mo to ratou Pariha.

Whakaetia ana.

Hone Mokeke, he Patai—Kei te pehea te whakaaro mo te patai a te Atimana i Ohaeawai mo tetahi minita mo Paihia? Whakahoki. Erua minita ka whakarikonatia a te raumati e haere ake nei, a mo Paihia tetahi.

Whakaaria e Rev. H. K. Taitimu, tautokona Rev. M. Kapa—Me kohi moni nga Pariha katoa o tenei Atirikonatanga mo tetahi Paraihe whakamaharatanga mo Rev. Hohepa Matiu ki te Wharekarakia i Kaitaia.

Whakaetia ana.

Whakaaria e Putete Heke, tautokona e Rev. W. P. te Waha—Hei te Pupuke, Whangaroa, te Hui o te Hahi Maori o te Atirikonaanga o te Waimate a te Wenerei, Pepuere 25, 1897.

Ko Enei Nga Tikanga O Era Atu Hui E Mau Tonu Ana.

I. MO NGA KURA RATAPU MO NGA TAMARIKI.

He whakahau tenei ki nga wahi katoa o tenei Atirikonatanga mo nga Kura tamariki i nga Ratapu kia tu tonu.

II.KAUA NGA WHARE-KARAKIA E WAIHO HEI WHARE-KURA RA NOA

Kia te whakaaro o tenei Hui, ekore e tika kia waiho nga Wharekarakia hei whare-kura i nga ra noa, engari me whakamotuhake mo te Karakia anake; a me whakatu ano nga whare-kura. Ehara tenei tikanga i te pei i nga tamariki i nga kura, erangi he mea kia motu k# te Wharekarakia, kia motu k# to whare-kura.

III.MO NGA MONI HAERERE A NGA MANGAI REIMANA.

Kia whakaaro nga tangata o nga Pariha ki o ratou Mangai Reimana, ki te whakaea i nga moni e pau ana i a ratou e haerere ana ki nga Hui. Ko aua moni me tango i roto i nga Kohikohi, me kohi ra waho ranei.

IV.MO NGA TURORO KIA WHAKAATURIA KI TE MINITA.

He kupu tenei ki nga tangata katoa o ia Pariha, o ia Pariha, mo nga turoro kia whakaaturia mai ki te minita; kia kaua e waiho kia takoto noa iho taea noatia to ratou matenga, ka korerotia ki te minita. He tino mea pouri tenei.

V.KIA HAERERE NGA MINITA KI TE TIROTIRO I NGA KURA.

Kia tae tonu nga minita ki nga kura tamariki i nga ra noa, ki te whakaako i nga tikanga o te Whakapono.

VI.KIA WHAKAMUTUA TE MAHI MAORI KI RUNGA KI NGA TAMARIKI.

Kaua nga tikanga Maori ki runga i nga tamariki kohungahunga i mua i to ratou iriiringa, hei muri ka kawea mai kia iriiria. He tino mahi he tena; me mutu rawa taua tikanga Maori i roto i nga tangata Karaitiana

VII.HE MAHI MA NGA HAHIWATENA.

Ma nga Hahiwatena o nga kainga e whakaatu ki te Minita ina tae atu, i nga tamariki mo te iriiri.

VIII.HE REHITA IRIIRINGA, MARENATANGA, TANUMANGA.

Kia tu nga tino Whare-karakia i nga Rehita iriiringa, marenatanga, tanumanga.

IX.NGA WHENUA MO TE HAHU.

Kia hohoro te whakamotuhake i nga whenua mo te Hahi, karauna karaati rawa, ka tuku ai ki nga kaitiaki (trustees).

X.NGA KOHIKOHU O NGA WHARE-KARAKIA.

Kaua nga kohikohi o nga Whare-karakia e meinga hei hoko kai mo nga Hui o te Hahi, erangi me ra waho he kohikohi mo ena mea.

XI.KAI TITIRO MONI.

Ma te Minita me tetahi tangata k#, ehara nei i te Hahiwatena, e titiro nga pukapuka kohikohi, e tatau hoki i nga moni o nga Pariha.

XII.TIKANGA MO TE NEHU TUPAPAKU.

Kaua te Kaikarakia e pokanoa te nehu i te tupupaku i te mea e tata ana te minita. Kia whakaae ra ano ia, katahi te Kaikarakia ka nehu.

XIII.UTU MO TE IRIIRI.

Kaua te minita e tono utu mo te iriiri; erangi ki te hiahia nga matua kia homai noa mai he mea ma te minita, e pai ana kia tangohoia e ia.

XIV.NGA TIKANGA E WHAKATAKOTORIA ANA E TE HUI.

Kia whakamana rawatia nga tikanga e whakatokotoria ana e te Hui o te Hahi.

XV.NGA MEMA NOHO ATU.

Ki te noho atu tetahi mema o te Hui, kia tae rawa ki te Upoko he reta whakaatu i te take i noho atu ai.

XVI. NGA TOHUNGA MAORI.

Kia whakakorea rawatia te haere ki nga tohunga Maori.

XVII. NGA PIRE MONI.

Kia marama rawa nga pire moni n nga Pariha ka ahei kia tango hia; ki te h# te pire ka whakahokia kia whakatikaia mai.

XVIII. RAWIRI MA NGA KAIKARAKIA.

Me tuku noa te Rawiri ma nga Kaikarakia tuturu o nga Pariha, ma nga wharekarakia e hoatu.

XIX.

Kia kua rawa te Hahi Maori e wehea mai i te Hahi Matua, ara i te Hahi o Ingarangi.

XX.

Kia whakatuturutia nga tau e tu ai te mangai Reimana ka ahei ai kia pooti ano, hei te toru o nga tau.

XXI.

Kia whakaaro te Hahi Maori ki te whakatakoto i nga moni toenga a nga Pariha hei oranga mo ratou.

XXII.

Kia kua e kahore he moni kawae i te Rongo Pai i nga pire moni o nga takiwa, ahakoa nui, iti ranei.

XXIII.

Kua rawa e hahua te tupapaku i tanumia ki nga wahi i wkakatapua hei Parikarauna.

XXIV. PAPA ME TE WHAEA HEI MATUAATUA.

He mea tika hei Matuaatua te papa me te whaea, a ma raua e whiriwhiri he tokotoru mo raua.

XXV. KOHI KIRIHIMETE.

Me kohikohi nga pariha katoa o tenei Atirikonatanga i nga Kirihimete, ahakoa Ratapu, ra noa ranei, hei Tahua mo nga mahi o tenei Atirikonatanga.

XXVI. TE TIKANGA MO TE KORERO.

Te ruuri mo te korero a nga mema o te Hui:—Ko te Kaiwhakaari: kia *rua* tunga ki te korero; ko to Kaitautoko kia *rua* tunga—ko era atu mema kia *taki tahi*.

XXVII. MAHI TOHUNGA KIA PEHIA.

E whakaae ana nga mema katoa o tenei Hui, kia whai kupu, kia, pehia nga mahi tohunga Maori e whakararuraru nei i nga Maori.

XXVIII. KOHIKOHI MO TE PEREHITANGA I NGA MAHI.

Me Kohikohi nga Pariha Katoa i te *rima* hereni, ia tau, ia tau, hei utu i te perehitanga i nga Mahi o te Hui.

XXIX.

Kia whakaturia e nga minita he kura Karaipiture mo nga Kaikarakia i nga Hatarei.

HE TOHUTOHU MO NGA WHENUA E TUKUA ANA MO TE HAHU.

- Me matua ruri.
- Ka oti te ruri me taku ki te Kooti whakawa whenua.
- Ka puta i te Kooti, me tuku ki nga Kaitaki (trustees). Kei nga kaituku te tikanga mo nga tangata ma ratou e tiaki, erangi kia uru te Pihopa, te Atirikona ranei ki roto i nga Kaitiaki.
- Ma te Pihopa e rapu tetahi wahi o te moni hei utu mo te ruritanga, me te whakawakanga o nga whenua e

tukua ana mo te Hahi. Me whakarite ta te Pihopa moni ki te pai, ki te nui ranei o te whenua.

HE INOI MO TE HUI O TE HAHI MAORI.

E te Atua Kaha rawa, kua oti te whakakotahi e koe tau hunga whiriwhiri katoa hei tinana mo tau Tama mo to matou Ariki mo Ihu Karaiti; ki te kuihui hoki ou tangata ki tetahi wahi i runga i tou ingoa, ko reira ano koe; kia anga mai te whakaaro atawhai ki tenei wahi o te Hahi, manaakitia mai hoki matou, te Pihopa, me nga Minita, me nga Mangai o te iwi kua mine mai nei ki te rapu tikanga. Kia riro mai i a matou nga taonga maha a tou Wairua Tapu, ara, te mahara, te mohio, te kaha, te aroha, me te ata whakaaro; kia whai tonu ai matou i roto i a matou mahi katoa, ko koe kia whakakoroiatia, ko te pai o to iwi kia kake, ko tou rangatiratanga kia whakanuia. Kei meatia tetahi mea e matou i runga i te tikanga totohe, i te whakapehapeha, i te matakuru ranei i te tangata. Kei hoki a matou mahi i te whakaaro poka noa ake, i te hianga ranei a te tangata: engari, kia ata whakatakotoria nga tikanga katoa e tupu pai i to Hahi i roto i a matou; kia mahia ai e matou katoa nga mahi pai kua rite mai nei i a koe hei mahinga ma matou; kia whakakotahitia ai matou katoa i roto i te whakapono, i te aroha; ki rite tahi ai hoki o matou whakaaro, me o matou mangai, te whakakororia i a koe; ko Ihu Karaiti hoki to matou Ariki. Amine.

Ko Nga Minita, Me Nga Kaikarakia Ena O Te Hahi Maori O Te Atirikonatanga O Te Waimate, Hanuere 1, 1896.

Ko Nga Moni Ena I Kohikohia E Te Hahi Maori O Te Atirikonatanga O Te Waimate I Te Tau, 1895.

Paua.

Te Kao.

Takapaukura.

Awanui.

Kareponia.

Kaitaia.

Parapara.

Peria.

Rangiawhia.

Kenana.

Pupuke.

Touwai.

Wainui.

Waimate.

Herekino.

Manukau.

Hautapoki.

Waiparera.

Anatioka.

Ahipara.

Taharoa.

[unclear: Pawaenga.]

Kaikohe.

Taumarere.

Ripia.

Waimamaku.

Kapehu.

Pakanae.

Taita.

Pehiaweri.

Ohaeawai.

Nga moni Tahua Atirikonatanga— Ko Rev. M. Kapa raua ko Pene Tikinui nga Kitiaki.

Nga Tangata, Nga Aha Noa O Te Hahi Maori O Te *[unclear: Atirionatanga]* O Te *[unclear: Wante]* O Te Tau, 1895.

Nga Mema O Te Hui Tuatahi O Te Atirikonatanga O Waikato. Ko Te Paraimete O Niu Tireni Te Upoko.

NGA MINITA.

NGA MINITA URU MAI.

NGA MANGAI REIMANA.

Ko te karakia i te Turei Aperira 14 i te 11 o nga haora. E rima tekau nga tangata i te karakia; 15 i tango i te Hapa Tapu. Ko te ohaoha £1 1s 6d i tukua mo te perehitanga i nga Mahi o te Hui. I te toru o nga haora ka mine te Hui ki te Horo a Hone Hetete, a ka mutu te karangaranga nga ingoa o nga mema, ka timataia te mahi e te Upoko ki te inoi. Muri iho ka tu te Paraimete ki te whaikorero—koia tena:—

I nga tau tuatahi o toku nohoanga ki Nui Tireni, kihai nga Pakeha i tukua mai ki tenei waahi o to Pihopatanga; a kihai i whai wahi te Hahi Maori. Tupu ake ana he whakatupuranga kahore i mohio ki te Rongopai o Ihu Karaiti. Inaianei kua rere ke te ahua, a kua ngakautahi te Pakeha me te Maori kia nohotahi i runga i te rangimarie, i runga i te aroha. I tae tae mai ano nga minita Maori o raro e era tau tau ki te tiroiro i o konei tangata, otira kihai i ata paingia e te katoa. Ko te rua tenei o nga tau o taku tononga mai i nga minita tokorua kia noho tuturu ki te Pourewa kia mahi ai ki nga kaainga o taua takiwa. Kua manakohia aua hoa o taton, kua whai tikanga ta raua mahi. Ko ta raua wahi e noho nei kei tahaki o te nuinga o te tangata, na reira i mea ai ahau me kore ranei e taea te whakaneke tetahi o raua ki waenganui o te iwi tokomaha. Tera pea e kitea e Ngatimaniapoto tetahi whenua hei nohoanga me te whare me tetahi wahi oranga mo taua minita! Tena te mea e tupu ai te Whakapono, ko te ako i nga tamariki i nga kaumatua hoki ki te Katikihama o te Hahi, ko te whakarapopotonga hoki tenu o nga tikanga o te Rongopai. Kia puta ano te uaua ki te tuku i nga tamariki ki te kura kia riro ai te reo Ingarihi. Ko te kuwaha hoki tena ki te matauranga o te Pakeha. E ahua pouri ana ahau mo te ruarua o nga mangai reimana i tae mai ki te Hui, otira he take ano pea i noho atu ai. Tokotoru o nga minita o te Atirikonatanga o te Waimate e noho nei. Te take o to ratou haere mai he mea kia mohio ai tenei pito o Hahi kei te mahara mai tera pito ki koutou.

Whakaaria e Rev. N. Tautau, tautokona e Rev. T. Hapimana—E whakapai ana te Hui ki a te Upoko mo tana whaikorero, a e tonono ana kia perihitia.
Whakaaetia ana.

Whakaritea ana ko Rev. T. Hapimana raua, ko Hone Hetete hei kaituhituhi.
Homai ana te pire moni o te Pourewa, me nga whakaari motini me nga patai.
I te Weneri ka mine ano te Hui i te hawhe paahi o te tekau.

Whakaaria e Rev. N. Tautau, tautokona e Rev. H. Moanaroa—Kia whakamutua te mahi Ratapu a nga Hauhau Pakeha.
Whakaaetia ana.

Whakaaria e Rev. N. Tautau tautokona e Rawiri Hauparua—Kaua a Hohepa Tana e nekehia i Waikato ina whakaminitatia.
Whakaaetia ana.

Rev. N. Tautau, he Patai—Ekore ranei e ahei kia hokia ano he korero mo Hopuhopu? Whakahoki—Ekore e ahei.
Paratene Kapa. E peheatia ana nga moni mo te reti o te taone i te Awamutu? Whakahoki a te Upoko—Ekore au e mohio.
Whakaaria e Rev. T. Hapimana, tautokona e Rev. N. Tautau—Kia puta he whakaaro i tenei Hui mo tetahi kura ki Hopuhopu.
Whakaaetia ana.

Whakaaria e Rev. T. Hapimana, tautokona Rev. N. Tautau—He tone ki te Pihopatanga ki waihotia he Paipera, he Rawiri ki te Hohipere, ki te Whare herehere.
Whakaaetia ana.

Whakaaria e Rev. T. Hapimana tautokona e P. Kapa—Kia tukua he minita Maori ki nga wahi katoa o Niu Tireni hei rapu orange mo te Hahi i Waikato.
Whakaetia ana.

Whakaaria e Rev. T. Hapimana tautokona e Rev. N. Tautau—He kupu whakapai na tenei Hui mo Kingi Mahuta mo tana whakatapunga i te Ratapu i roto o Waikato.
Whakaetia ana.

Paratene Kapa—he patai—Ekore ranei e whai mana nga rikona ki te iriiri kaumatua? Te whakahoki a te Upoko—Ae ka whai mana ano.
Whakaaria e P. Kapa, tautokona e W. Huihi—Ki te Pourewa te Hui o te Hahi Maori o Waikato a te tau 1897.
Whakaetia ana.

Whakaaria e Atirikona Karaka tautokona e Rev. W. H. Matete—He whakapai ki te whakamanuwhiri a te tangata whenua, ki a Hone Hetete hoki mo te tukunga noatanga mai o tenei Hooro.
Whakaetia ana.

Whakaaria e Rev. T. Hapimana, tautokona e Rev. N. Tautau—E whakawhetai ana tenei Hui ki nga minita o Ngapuhi mo to ratou taenga mai.
Whakaetia ana.

Nga Moni O Te Pourewa I Te Tau 1896.